

Date – 05/10/2025

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Agriculture Department Minister Pu P.C. Vanlalruata chuan Mizo infiammite chu ruihhlo a fihlim tur leh mahni inthunun thei turin a chah.
2. Excise Minister Pu Lalnghinglova Hmar chuan nimin khan Vairengte-a Excise Check Gate a tlawh a, tunhnaia an hmasawanna chu lawmawm a tih thu sawiin fimkhur leh taima zual turin a chah.
3. Election Commission of India chuan Bihar-a inthlanpui lo awm turah political party hrang hrang aiawhte a kawm.
4. Union Health Ministry chuan naupang kum 2 hnuai lam hnenah khuh leh hritlang damdawi pe lo turin thu a chhuah.

<><><>

AGRI MINISTER

Agriculture Department Minister Pu P.C. Vanlalruata chuan Mizo infiammite chu ruihhlo a fihlim tur leh mahni inthunun thei turin a chah.

Minister hian nizan khan Rajiv Gandhi Stadium, Mualpuiah Aizawl District Football Association buatsaih ADFA First Division League final a hman pui a. Pu PC Vanlalruata chuan, infiam mite zinga hun a hmang thei chu lawmawm a tih thu a sawi a. Football chu khawvel pum huap pawha game ngaihhlut hlawh a nih thu leh Mizote chem kalna tak a nih bawk thute sawiin, infiam mite chu theih tawp chhuah zel turin a chah a. Infiamna reng rengah chuan mahni inthunun theihna leh ruihtheihthil laka fihlimte chu hlawhtlinna bul a ni tih tarlangin, chung chu hre reng a, hlawhtlinna chang chho zel turin infiam mite chu duhsakna a hlan nghal bawk a ni.

Final-ah hian Ramthar Veng chuan Ramhlun North chu goal hnih goal khata hnehin an champion. Final lut team pahnih Ramthar Veng leh Ramhlun North team te hi Mizoram Premier League season thar Qualifier khel turin an tling nghal a ni.

<><><>

CCM

Council of Churches in Mizoram (CCM) chungchang zir hona chu nimin khan Presbyterian Serchhip Kawnpui Kohhran Jubilee Hall-ah neih a ni.

Seminar-ah hian CCM lo pian chhuah dan leh hma lam hun thlirna tih thupuiah hmangin, CCM Gen Secy Rev Dr Lalhmangaiha ziah chu ama kaihhruaiin zir ho a ni a. Chawhnu group hrang hranga inthenin sawi hona neih zui leh a ni bawk.

Seminar paper-a a lan danin- Kohhran thawh ho rawtna hi kum 1949 ah intan tawh in, kum 1957, 1964, 1969 leh 1979 ah ah te pawh rawtna mumal tak

awmin, inhmukhawm pawh neih zauh zauh a ni chungin, kum 1983 atang kha chuan he lama chetna chu a reh a ta vang vang a. Nikum October ni 27 khan Council of Churches in Mizoram chu hawn a lo ni ta a ni.

CCM-ah hian kohhran pawl 9 thawk ho in, chu'ng te chu- Mizoram Presbyterian kohhran, Evangelical Church of Maraland, Evangelical Church of India, Independent Church of India, Isua Krista Kohhran Bualpui Ng, Lairam Isua Krista Baptist kohhran, Mizoram Baptist Kohhran, Wesleyan Methodist Church leh Zomi Baptist Church te an ni.

<><><>

EXCISE MINISTER

Excise Minister Pu Lalngthinglova Hmar chuan nimin khan Vairengte-a Excise Check Gate a flawh a, tun hnaia an hmasawna chu lawmawm a tih thu sawiin fimkhur leh taima zual turin a chah.

Excise Minister Pu Lalngthinglova Hmar chuan tun hnaiah Excise & Narcotics-a thawkte thahnemngaihna zarah ruihhlo man a pung a, Vairengte Check Gate a thawkte pawh an thawhrimna leh hmasawna chu lawmawm a tih thu a sawi a. Sorkarin Excise & Narcotics Department a ngaipawimawh tih sawiin, kum 2024 chhungin district thar pathum - Saitual, Khawzawl leh Hnahthialah te Excise Station hawn thar a ni. Department chak leh zual nan post thar 12 siam niin, thawktu indaih lohna puhru turin direct recruitment hmangin mi 16 lak an ni tawh a, midang 33 lakna tur a kal mek bawk. Ruihhlo do kawnga pawimawh tak motor thar 18 (LMV – 14 leh Two-wheeler – 4) lei thar bakah LMV hman mek pathum chu Mizoram sawrkarin a pek thu a tarlang a ni.

Minister chuan sawi chhunzawmin, “Police nen tangkawpa ‘Ruihhlo Do Beihpui’ kalpui mekah Excise & Narcotics Department chuan mawhphurhna lian leh pawimawh tak an nei. Sawrkarin a duhsak a, kawng hrang hrangin department a thumchak a, chumi thung rul tur chuan tha zawka thawh a ngai a ni.” a ti a. Vairengte chu hmun danga Excise awmte aia langsar an nih avanga fimkhur leh taima zual turin a chah a ni.

Excise Minister hi Vairengte OC Inspector Malsawmdawngzela'n a lo dawngsawng a. Tun dinhmunah Excise & Narcotics Station, Vairengte-ah hian Inspector pakhat, Sub Inspector pahnih, Head Constable pahnih, Wireless Operator pahnih leh Constable 11 an awm mek a ni.

<><><>

MST BUS SERVICE

Mizoram sorkarin Aizawl leh Sairang rél chawlhmun inkara Mizoram State Transport (MST) bus a service tir chu Aizawl leh Sairang inkarah vawi 18 tlan tawhin, Aizawl leh Sairanga kal tur passenger 426 a phur tawh a ni.

Akashvani thu dawn danin, thla hlui September ni 29 atang khan Transport department chuan mipuiten awlsam zawka rél service an hman tangkai theih nan Aizawl leh Sairang inkarah MST bus - seat 40 awmna a service tir a, Bus hi pahnih service tura hisap a ni mahse, tunah rih chuan bus pakhat hi a la tawk theih rih avangin pakhat chauh an tlan tir mek ni a thudawn a ni.

(MST Bus service hi nitin hunbi neiin Aizawl leh Sairang atangin a chhuak a; kar khat chhung hian Aizawl atangin sairang lamah vawi 16 leh Sairang atangin Aizawl lamah bawi 16 tho tlan tura ruahman a ni. Bus hi kartin Thawhlehi leh Zirtawpniah Aizawl leh Sairang atangin vawi 3 ve ve a tlan a; a bak nidang zawngah chuan vawi 2 ve ve zel a tlan a ni. Bus chuan man hi mi pakhatat Rs 80 a ni a, ticket hi Chalalang Transport Complex leh Transport Directorate-a MST Booking Counter-ahte lak lâwk theih a nih bakah, ticket la lâwk remchang lo tan pawh bus conductor hnenah ticket man pek mai tur a ni.)

<><><>

PINEAPPLE

Mizoram a lakhuihthei thar chhuak tam ber Sialhawk khua chuan kumin atan Lakhuihthei an hralh zo ta a. Sialhawk khuaah hian tun dinhmunah chhungkaw 240 velin Lakhuihthei hi chingin Mizoram a Lakhuihthei thar chhuah zawng zawng atangin za a 64 vel an thar chhuak pha a ni.

Sialhawk khua hian kuminah hian Lakhuihthei hi Quintal 11,240 vel an thar chhuak a, Lakhuihthei an hralhna leh a kaihnawih hrang hrang atangin kuminah hian cheng vbc 1 nuai 75 leh sing 2 vel an la lut a ni.

Sialhawk khua hian inremna an siam angin kumtirah khan Guwahati a North East Aeromatic Company hnenah Lakhuihthei hi Kg.1 chu Rs.10/- in an hralh a, amaherawhchu kawng chhiat avangin Company lam hian vawikhat bak an laksak thei ta lova. An Lakhuihthei thar chhuah te tualchhung leh khaw chhehvelah te theih ang anga tihralna tur an zawn laiin August ni 13 atang khan Chhingchhip a MIFCO hmunah Lakhuihthei hi an hralh a, MIFCO hian Quintal 170 leh Kg.88 an leisak hman a. MIFCO-ah hian chawlhkar 2 vel Lakhuihthei an hralh hnuah a bak zawng chu tualchhung leh khaw chhehvelah te an hralh a. Thla hlui ni 25 vel khan kumin atan Lakhuihthei a hlawm a hralh chhuah chu an zo fel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ECI

Election Commission of India chuan Bihar-a inthlanpui lo awm turah political party hrang hrang aiawhte a kawm.

Chief Election Commissioner Gyanesh Kumar chuan Bihar Assembly inthlanpui lo awm tur atan political party hrang hrang aiawhte a kawm a. BJP, JD(U), RJD leh party dang aiawhte chuan inthlanna thianghlim, muanawm leh mi zawng zawng huapzo inthlanna neih a nih theih nan an ngaihdan leh rawtna te an thlen a. BJP President Dilip Jaiswal chuan Election Commission of India hnenah inthlanna chu thawh hniha neih tura ngen in, thlaleh ni 3 emaw ni 4 a neih an duh thu a sawi.

<><><>

UHM

Union Health Ministry chuan naupang kum 2 hnuai lam hnenah khuh leh hritlang damdawi pe lo turin thu a chhuah.

Union Health Ministry chuan naupang kum 5 hnuai lam hnenah pawh khuh leh hritlang damdawi pek chu a him loh thu sawiin, kum 5 chunglam pek dawn pawn uluk taka endik hnuai pek chauh tur a nih thu an sawi a. Ministry chuan Madhya Pradesh leh Rajasthan-a naupang thi te chu khuh damdawi an in avanga thihna thleng ni an hriat avangin State leh Union Territory ah te he thupek hi an chhuah a ni.

<><><>